



鳳洲筆記明詩評目錄

卷九

李君夢陽

何君景明

李君攀龍

徐博士禎卿

謝山人榛

高按察叔嗣

邊尚書貢

鄭郎中善夫

薛考功蕙

馬侍郎汝驥

喬三石世寧

高太史啓

孫山人一元

唐司諫順之

華學士察

王裕州廷陳

楊脩撰慎

嚴少師嵩

王太保廷相

王僉事謳

卷十

常評事倫

皇甫僉事淳

王檢討九思

袁侍御凱

曹布政嘉

顧尚書璘

王宮諭維禎

祝京兆允明

王太學寵

陳提學東

徐邑令獻忠

施邑丞漸

朱叅應政登

屠官諭應竣

袁提學袞

劉尚書崧

劉司空麟

楊按察基

汪丞相廣洋

王博士偁

陳山人鶴

張修撰泰

劉中書彥昂

偶吏目桓

殷授教奎

黃少詹佐

熊侍御卓

陸太常鉞

康修撰海

唐解元寅

蔣叅政山卿

楊文貞士奇

林員外鴻

蔡孔目羽

鳳洲筆記詩評目錄上

殷授授奎

黃少詹佐

能侍御卓

陸太常武

蔡开目陔

林貞叔點

蘇文貞士奇

鳳洲筆記卷之九

海虞文臺黃美中校

明詩評一

李君夢陽

李夢陽字獻吉慶陽人也從其父宦游之大梁遂家焉舉進士為戶部主事遷員外郎時長沙公為相稱能詩赫然奔走海內人士稍聞夢陽名自折盛欲相近而夢陽雅不欲乃日夜取左氏遷史騷雅李杜二家集風之

其所作遂傳海內云而夢陽為郎特嘗上書
言外戚張氏及它論治體文甚奇下獄矣
天子仁聖赦出不罪而又之

上崩 太子即位中貴人始夤緣把朝事將
亂大司徒洪洞公憂之夢陽乘間說大司徒
合六卿極論中貴人不勝夢陽坐具草放為
民三年以按察副使起視江西學政復坐與
藩長構訐免獻吉度不可復用即歸大梁即
中益讀書及為詞文間從閭里俠少年射獵

繁吹臺間宅郡國守相使者慕獻吉踵贄幣
一見而獻吉傲睨故不禮或時坐賓席使客
侍坐客中已敬之不恤也獻吉玉立朗朗意
無可一世居官雖僚案少忤即手批之遇書
有不記者曰唐以下乎果然歸十六年卒卒
年五十九所著集行於世

評曰此道蕪千餘年至夢陽始闢之社稷勛
哉其詩如孫吳用兵奇正闔闢變化不窮又
如蒼鶻擊空雲龍戲海健急怪偉種種入神

何君景明

何景明字仲默信陽人也少從師習春秋十六始改習尚書而遂以尚書魁於鄉二十舉進士授中書舍人景明秀而臞若不勝又和煦人人可自歸近之獻吉詩名重海內景明後出一日而與之齊公卿縉紳先生亡不願面何君者已謝病歸里中貴人瑾按而惡稱病俱罷不叙景明亦罷瑾誅召復故官直內閣久之進吏部員外郎仍故直踰歲遷按察

副使視關中景明學政嚴而詳明人亡敢奸者三載謝病歸卒年三十九所著集行於世

評曰景明詩如太華芙蓉秀出雲表朝霞貼水燦爛萬狀又如西施毛嬙工藝絕世婉戀有情氣力少讓李夢陽燦燦動人頗自不減

李君攀龍

李攀龍字子鱗歷城人也舉進士今為刑部郎中于鱗於書無所不通為人狷介忠信而

好爲深沉之思當所未得或竟日夕忘食寢
家故貧又官常調而絕不肯逐衆爲奸謁泊
如也卽世所稱說名士亡可當于鱗云而于
鱗顧折節與余好居恒相勉戒吾子自愛吳
人屈指高譽達書不及子子故非其中人也
予愧而謝之又嘗慨然稱少陵氏沒千餘年
李何廓而未化天乎屬何人哉

評曰于鱗宏麗渾壯鮮所不有又濟之沉思
假以數年奚讓二氏哉太嶽一室芝菌膠結

光華若朝霞芬旨入九咽庶乎其近之美

徐博士禎卿

徐禎卿字昌毅太倉人也舉進士爲大理寺
副父之以不能其職下遷國子博士卒年僅
三十三所著集行於世

評曰禎卿體質高朗推短吏牘旣淹常調復
爾下遷齟齬自可天折何甚王伯安志墓盛
欲收入門下非實錄也詩韻本清華調復古
秀如白雲自流山泉泠然殘雪在地掩映新

月又如飛天仙人偶游下界揖遜殊乏終然
出塵使少加沉鬱之思微振渾灑之氣雖何
李亡易也

謝山人榛

山人名榛字茂秦臨清人也貌醜一目弱冠
為俠齊魯間多度艷曲稍長折節讀書詩奕
奕稱於人趙王問而禮之致府已不自得游
京師著遊燕集六卷

評曰茂秦介越之資被以質異不問家人生
產交遊泊如也即其養素照好幾乎自然究
其勇詣必底便可成佛李生同志寔深琢磨
詩宗法少陵窮體極變原肯推用五七言律
得其十九近時之麟鳳哉布衣風格從古未
有孟浩然亦當退舍

高按察叔嗣

高叔嗣字子業大梁人也舉進士為工部主
事調吏部累遷驗封郎中謝病歸久之還為
郎中擢山西右叅政稍遷按察使乃卒年三

十九所著集行於世

評曰叔嗣詩如高山鼓琴沉思忽往木葉盡脫石氣自青太工鈎削間傷局促夫其不壽此或徵之然咳唾珠璣人倫之雋乎哉

邊尚書貢

邊貢字廷實歷城人也弱冠舉進士授太常博士擢戶科給事中遷太常寺丞出為衛輝守父之以按察副使視湖廣學移病歸今皇帝初召拜太常少卿遷太常卿累進南京

戶部尚書尚書美姿風流饒吏事好交與天下豪俠其所搜積今石古文幾徧屬

主上清明備聞秩亡所見稍稍游歷畱司諸山水竟日夜而又好浮白多屈其坐人汪鉉時長憲心思尚書名以為罪論去之卒年五十七所著集行於世

評曰何李赤幟貢寔雁行羽儀詞林膾炙藝圃所惜者氣格少讓師友或踈耳詩如洛陽名園處處錦爛五陵遊俠裘馬千金雖復大

鳳洲筆譜卷之九
雅不心醉手五言律勝七言七言律勝古

鄭郎中善夫

鄭善夫字繼之閩人也二十舉進士爲工部主事謝病歸起補禮部遷郎中再乞歸今

上初 召爲南京吏部郎道卒所著集行於

世

評曰善夫遭時不吊抗疏削跡日晏未炊欣然自如名山幽谷竺簫幾遍詩規倣少陵兼目變故時寓幽憂或傷椎朴如黃河積冰寒

色千仞石骨巉巖俯入深澗連城之壁不損

微瑕

薛考功蕙

薛蕙字君采亳州人也舉進士爲吏部主事累遷考功郎中時議禮與新貴人忤不合中以宅事下獄得白因謝病歸

皇太子立議官坊臣

詔且用考功矣已病卒年五十三集今行於世

鳳洲筆記卷之九
評曰蕙詩如刻錦雲霞疊石島嶼欲以人巧而擬自然未及大觀能亡激賞間作冲澹如落花游絲情致可喜稍更骨氣便復無儔矣
五言古勝律五言律勝七言

馬侍郎汝驥

馬汝驥字仲房關中人也舉進士為翰林庶吉士當授矣而會先上疏忤

天子詔特出為州守今

皇初召還授編脩擢脩撰國子司業久之守

南京通政叅議遂為國子祭酒擢禮部右侍郎進兼學士卒年五十餘有集行於世

評曰汝驥詩如程衛尉屯西宮斥候精嚴兵騎雄整不無過苦之歎大氏有沉理而無玄趣然自關中諸公未能與之勁敵也

喬三石世寧

喬世寧關中人也舉進士為南京戶部郎擢四川按察僉事尋遷副使視湖廣學今為河南左叅政

評曰叅政趨本爾雅調亦清和規模沈宋時
沿李白劉生入塞寄王玉壘諸作如新月在
樹晶晶瑩瑩清泉倒澗琮琤琤尤壁府之
卞珠林之隋也楚政之後太簡率寡沉鬱之
思昔人謂山川奇文章何背馳爾耶

高太史啓

高啓字季迪吳人也元末往來避亂越中
高皇帝卽位召授翰林國史編脩久之遷戶
部侍郎太史以少不習辭上面慰勞予金楮

罷歸而會郡守魏觀修齋閣成太史爲文記
書邑臣告郡守觀罪語連太史併逮腰斬時
年二十九所著集行於世

評曰悲哉乎元格下也太史因沿浸淫雖忽
忽未振而弘博凌厲殆駸駸正始一特宿將
選鋒莫敢橫陣格姑左次弗論評其辭快若
迅鶻乘颺良驥躡景麗若太陽朝霞秋水芙
蕖縱負可點之瑕奚廢連城之賞詞家射雕
手也若使少就沈思兼反古調豈出何邊下

哉

孫山人一元

孫一元字太初莫知何許人也頎而微操秦音遂謂關中人云向多游歷吳楚間至吳興娶施氏妻之妹不久而卒所著詩集今行於世

評曰太初齋本王家跡托方外鶴瓢鐵笛白恰玄巾嘯傲飄灑風神朗秀既娶婚娶遂爾湮沒悲夫悲夫詩如雪夜偏師間道入蔡毋論必勝也已是出奇又如鳴蜩伏蚓雖呼吸月露而身在槁壤信乎有格哉

唐司諫順之

唐順之字應德武進人也舉進士高第爲翰林庶吉士授吏部主事已調官編脩其得累調也宰相知之故乃司諫則故遠宰相移病歸久之

太子立設置東宮官曹

召補右春坊右司諫編脩如故上坐書忤

天子意斥爲民不復用

評曰弘正間何李輩出海內學士大夫多師尊之迨其習弊者音響足聽意調少歸剽竊雷同正變雲擾太史稍振之爲初唐即其宏麗該整咳唾金璧誠廊廟之羽儀文章之瑚璉然欲盡廢二家之業殆猶溺嗜海錯而廢八珍者也歸田以後又見別紀

華學士察

華察字子潛無錫人也舉進士改翰林庶吉

士授水部主事移疾歸還補駕部進郎中屬新貴人用多事斥逐翰林儒臣而別有所進補因緣入爲修撰稍遷侍讀久之進侍講學士視南院篆以給事御史論罷

評曰學士閥閱貴胄少都清顯迴翔秘苑雖適仕逕羈轄塵駕猶迷素質旣以薄譖焚魚返跡惠山之墊藉典肆其菁華泉石縱其嗽枕刊洗浮靡獨秀本色如秋水涸天根露木葉脫明蟾出誠陶韋之妙境蓋詩宗之玄解

也惜才具稍乏七言微短天方假年昌大所就曷有既哉

王裕州廷陳

王廷陳字稚欽黃州人舉進士為翰林庶吉士有才名而傲睨不檢為衆所惡富授官吏部擬給事中上矣

詔罷不用出為裕州守又坐按殺人下獄論

城旦

評曰裕州縱性為狂多才誤用投美璧於頑

鑛點麗錦以青蠅踰冠登朝未立罷免既不
能謝跡塵鞅棲神玄境又不能自勵絕翮章
賁雲衢英氣徒捩於眉宇激昂時出乎篇章
如黃河下流迅決任性雲錦蕩漾風波激旋
自無定則五言或繇感慨或近自然頗多佳
境七言更無一章可謂才難矣

楊脩撰慎

楊慎字用脩新都人舉進士第一為翰林修撰又之以伏

闕事下詔獄攷問杖

朝堂幾死戍永昌三十餘年不得歸有集若干卷行於世

評曰修撰筆任手運誦由目成翱翔中秘既窮青藜之校流戍南滇遂肆朱鼎之識凡所取材六朝為冠固一代之雄匠哉特其搜擷太饒格調時左繁飾人工或累天悟又其微趣多在長吉振奇之士卑其刻羽雕華陋中之徒駭其牛鬼蛇神班郢之思獨苦膏肓之

病難醫良可歎也

嚴少師嵩

嚴嵩字惟中分宜人舉進士為翰林編修遷侍讀累官少師太子太師吏部尚書華蓋殿大學士有鈴山堂集行於世

評曰嵩詩少年如碧荇依依水清石見春雲綴空濃淡有情惜氣格小緩結語意盡耳後不復點檢隨人得之豈廊廟泉石體裁自別耶抑所謂不復唱渭城者耶

王太保廷相

王廷相字子衡儀封人舉進士為給事中以言事謫

召復拜監察御史再謫贛榆丞稍遷同知寧國郡累進四川按察使入為兵部侍郎出行邊還擢南京兵部尚書理都察院滿九載加太子太保罷歸卒年七十餘有集行於世評曰廷相渾渾如高鼎使人抗浪意氣殊乏精韻古詩歌行小勝近體

王僉事謳

王謳字舜夫關中人也風神散朗負氣豪俠舉進士為工部主事遷刑部郎再遷按察僉事填宣府引疾歸卒年三十六有集若干卷行於世評曰謳詩頗饒氣格兼多沉思惜其純駁半之如披沙見金治璞取玉殊勞匠乎

鳳洲筆記卷之九

鳳洲筆記卷之十

海虞文臺黃羨中校

明詩評二

常評事倫

常倫沁水人二十舉進士有詩名而任俠好
飲擊射爲一時冠授大理寺評事謫州倅稍
遷爲守矣而與上官不相得坐論免歸評事
嘗過掃其祖墓醉而衣紅袍佩刀馳馬度水
馬顧影驚跌丹出於腹死年三十四

評曰倫詩如汗血名駒驕嘶自賞雖步驟未合而毛骨非凡見者知其千里

皇甫僉事洵

皇甫洵字子安長洲人舉進士為禮部祠祭郎中改右春坊右司直郎左授大名通判稍遷浙江按察僉事復坐貶以死年四十九有集行於世

評曰洵以高第清曹競心傲習兩遭公議悒悒而沒詩如蜀綵吳葩爛爛郁郁得意處如玉盤露屑清甘可人七言衰弱更所不論

王檢討九思

王九思字敬夫舉進士為翰林庶吉士授檢討父之改吏部主事進郎中逆瑾敗以檢討鄉人也下遷壽州倅再論罷歸

評曰敬夫棲華禁署振策大曹連坐下遷躡履泉石康生同志多托新聲揆麗藻之景抒妻鬱之抱按錦瀉珠良足悲賞詩格渾渾中歲傲何李如優孟為孫叔容咲頗似暮年率

易遂露本色

袁侍御凱

袁凱華亭人洪武中舉進士為監察御史應對忤

上旨托風疾求歸

評曰凱詩如兒鷹試風未成長已自縱快蘇李之圖頗見風雅白燕之什亡忝閨房雖未登大曆之堂實已超宋人之乘至其玄覽先事夷跡藏身丘園削資金石留響庶幾哉逸

民之行歟

曹布政嘉

曹嘉字茂禮大梁人也舉進士為翰林庶吉士以言事出補郡推官

召復監察御史又以言事下獄謫判茂州累遷福建按察使以山西布政使罷嘉故李夢錫弟子有才名好鬪無禮所至畏而避之評曰嘉詩如公孫大娘弟子舞劍頗足奇勁見其師者不覺愴然傲慢無禮所謂舜子不

肖

顧尚書璘

顧璘字華玉吳人舉進士爲南京吏部郎累遷開封守與中貴人忤左遷全州守再移台州仕至浙江布政使乞病歸以副都御史召撫楚擢南京刑部尚書罷歸卒年七十餘所著集行於世

評曰尚書器並瑚璉材懸綺繡束髮班行遂屈羣公之左珥管江表首馳三傑之目如春原盡花靡邁錯離又如過雨殘荷雖復衰落尚有微情

王宮諭維禎

王維禎關中人舉進士改翰林院庶吉士授檢討遷修撰今爲右春坊右諭德視畱院事評曰宮諭高朗傑出刻意少陵一時藉甚之譽海內無幾第宛轉屈曲旣乏天然粗重突兀良背人巧自負詩宗上乘永無改轍窺哉千餘年杜氏惜哉二十載王君彼逐影追聲

之徒何足道哉

祝京兆允明

祝允明字希哲吳人也舉鄉試數上南宮不第什褐授南海令遷應天通判自免歸卒年六十九有集若干卷

評曰允明書法雄勝滑稽傲睨詩法六朝兼采後代如五陵少年走馬峻壁又如咸陽一炬玉石難辨作小解雜劇頗累風人面目諸他五七律未講開元大曆之間者也

王太學寵

王寵字履吉吳人太學生有集行於世

評曰履吉風流醞釀詞翰珠璣部使推許聲名藉甚累戰皆北恇悒靡和僅滿餼入太學垂五十而歿良可念哉詩如光祿宴使臣鉅釘嚴整不耐咀嚼亦無珍貴然以骨格差勝文生

陳提學東

陳東字約之會稽人踰冠擢上第為翰林庶

吉士亡何授禮部主事改編脩以忤時宰出
湖廣僉事進按察副使視河南學政尋卒年
三十餘

評曰東詩如十五六女子容態楚楚見人羞
澁又如織一段錦非乏可觀短俠不稱雖噪
一時之名終睽百代之軌

徐邑令獻忠

徐獻忠華亭人鄉貢什褐令免歸

評曰獻忠詩法初唐又多六朝語雜組成章

積貝為飾如入萬花之徑終靡三山之骨

施邑丞漸

施漸字子羽

評曰漸詩如寒鴉數點流水孤村非不清絕

惜其景物蕭條迫晚意盡錢起長卿之流要

當並轡耳

朱叅政應登

朱應登字升之寶應人二十餘舉進士為戶
部郎出守延平久之擢陝西提學副使雲南

左叅政罷歸

評曰應登詩於何李如桓宣武似劉司空無所不恨

屠宮諭應竣

屠應竣字文升平湖人也舉進士為禮部祠祭郎中改翰林修撰進侍讀再遷太子諭德以病乞假卒年四十三

評曰宮諭輝燄逸逸藻思翩翩汎濶百氏之英含咀六朝之俎未加裁割遽爾永終德謝

冉牛遂起斯人之歎才同盧照亦諧赴水之

徵

袁提學袞

袁袞字永之吳人也舉進士高第改翰林庶吉士授兵部主事公署火適戍閩越赦歸起為按察僉事視廣西學政歲餘移疾乞休尋卒年四十有六

評曰袞詩如築室城邑位置整嚴終乏悠然之思又若麗魚入水圍圍未舒滔滔莽莽當

讓關河之客

劉尚書崧

劉崧字子高

高皇初爲北平按察副使 召拜禮部侍郎
遷吏部尚書致仕歸再起權國子司業卒

評曰崧詩如雨中素馨亦復嫣然情色俱勝
若作寒梅老樹便自風骨且風人之類出皇
始之盛家也

劉司空麟

劉麟字元瑞安仁人也弱冠舉進士正德中
由尚書郎爲紹興守有異政人謳思之遷山
西按察使累官工部尚書乞致仕歸

評曰司空朗爽登朝榮躋八座急流湧退用
諧素心烟霞之癖吏多泉石之身難老其詩
如癡女兒能織鴛鴦謂未藝絕更繡鳳凰並
無此鳥可發一咲

楊按察基

楊基字孟載洪武中起家大官署今累遷按

察適歸卒

評曰基詩如西湖柳枝綽約近人顛頓特甚情至之語風骨掃地

汪丞相廣洋

汪廣洋初事

高皇帝爲中書左丞相出行省叅政

召拜御史大夫封忠勤伯復爲特進中書右

丞相貶海南飲藥死

評曰丞相負排解之異才表磊落可稱偉氣

作爲歌詩如振鉄生光跳珠呈曜格姑未論

聲重一時矣

王博士偁

王偁字孟揚舉薦爲翰林博士從英國公平

南交還坐怨望賞薄下獄死

評曰偁詩如塵中車但取馳騁未辨所載較之解生近似小勝竟以恃才傲橫罹讒口盆死囚獄良可傷也

陳山人鶴

陳鶴字九臯山陰人也家世武弁當受秩不可葛巾布袍稱山人云

評曰陳生氣色高華風調鴻爽初法杜氏未由點化後入中睿亦鮮悟解既寡全牛之語復乏半豹之蓄春容乎短章寂寥乎大篇十室之肆庶其實而

張儵撰恭

張恭字亨父太倉人舉進士為翰林庶吉士授檢討累遷修撰卒年四十有九所著集今

行於世

評曰恭詩如飲醇醪甘鮮可口不耐咀嚼亦少筋骨間有一二清絕如曲澗流泉之長沙易殆猶甚焉謂彼精思不亦宜乎

劉中書彥昂

劉彥昂字以行鄱陽人事

高帝為中書典籤

評曰彥昂詩篇峻潔尤多樂府清絕之氣雖可觀淒楚之調為尤甚既累簡質然亦非本

語耳

偶吏目桓

偶桓字武孟太倉人爲荊門州吏目

殷教授奎

殷奎太倉人爲府教授

評曰二子並起名家共遵唐軌屹爾樹立卓

然不群吏目頗諧風格故多鴻爽之辭教授
兼至才情尤工感愴之調誠吾邦之盛軌張
陸之前驅也

黃少詹佐

黃佐字才伯嶺南人舉進士高第爲翰林庶

吉士授編修遷廣西提學僉事歸

太子立召爲左司諫遷侍讀太子右諭德

國子祭酒母喪服除拜少詹事兼侍讀學士
會吏部侍郎闕佐意且得之而言者忌佐論
罷所著集若干卷

評曰佐詩如刁家黠奴連車騎交守相揮散
千金原非已業

熊侍御卓

熊卓字士選新喻人登進士為監察御史正德初以黨人罷歸卒集今行於世

評曰侍御才短思苦所著不多見然風調秀質亦一時名手也如寒蟬乍鳴清楚之外更無別致耳

陸太常鈇

陸鈇字鼎儀太倉人舉進士會試第一

廷試第一為翰林編脩遷修撰滿考為右諭

德進太常少卿翰林侍讀以疾歸卒

評曰鈇詩如噬乾肺少有風味殊難齟齬西涯稱其有作必淫殫精劇不肯苟就然多晦澁之辭無取敦彞之舊

康修撰海

康海字德涵武功人也舉進士第一為翰林修撰以逆瑾卿人故罷官有集行於世

評曰太史制策聲名傳溢海內竟以闖人之敗削藉歸耕沒齒為錮頗效楊惲南山之田

趙瑟秦聲倚歌擊筑詩如河朔丈夫鬚髯戟
張借軀報仇人疑大俠與之周旋乃是酒肉
傖父

唐解元寅

唐寅字伯虎又字子畏吳人也舉鄉薦第一
坐事除名

評曰寅實異才中道齟齬既伏吏議任誕以
終詩少法初唐如鄆杜春游金錢鋪埒公子
調馬胡兒射雕暮年脫略傲睨務諧俚俗西
林據几為珍重之觀哉

蔣叅政山卿

蔣山卿字子雲上元人也舉進士累官為尚
書郎上言事外謫復累遷郡守以叅政歸
評曰子雲負一時才名流麗清逸固是當家
然乏沉雄之思售價自淺

林貞外鴻

林鴻字子羽閩人國初仕為膳部員外郎

評曰子羽命才克裕標格華秀堤柳宮花之
句至於炫名宅作實多勝者

楊文貞士奇

楊寓字士奇名寓以字行廬陵人起家布衣
爲王府審理副

文皇帝初擢編脩入內閣預機務遷翰林院
學士兼左春坊左諭德輔

皇太子監國後累官少師兵部尚書華蓋殿
大學士卒年八十謚文貞

評曰少師韻語妥協聲度和平如澆制書生
雖復酬酢馴雅無復生氣

蔡孔目羽

蔡羽字九達吳人也爲南京翰林孔目嘗薄
少陵以爲不足法云

評曰九達少負燁藻螾躋賢科老得微官婆
娑留署詩如灌莽中薔薇一枝汀際小鳥娟
然潔白至欲罵佛呵祖可謂蟬蛻撼樹矣

鳳洲筆記卷之十

鳳洲筆記明詩評目錄

卷十一

曾少詹祭

陸詹事深

宋學士濂

王侍制禕

劉布衣仔肩

劉布衣績

唐應奉肅

唐侍講之淳

浦舍人源

張汀洲寧

吳文定寬

陳檢討獻章

王太僕韋

郭叅軍奎

沈居士周

文待詔徵明

楊儀部循吉

石文隱珪

劉布衣泰

馬布衣洪

張提學和

莊驗封景

王叅軍慎中

唐太史順之

劉御醫溥

湯叅將胤績

王文靖璫

陳檢討繼

胡中丞纘宗

邵文莊寶

儲文懿權

岳修撰正

卷十二

解學士縉

張中丞楷

張興化琦

劉叅政昌

夏布政寅

張學士以寧

黃五岳省魯

謝文肅鐸

廖學士道南

童庶子承叙

桑通判悅

張山人詩

張山人含

劉誠意基

許中丞宗魯

孫左司炎

王新建守仁

唐太宰龍

張太常羽

徐布政賁

江提學以達

汪廷尉文盛

蘇司馬祐

郭定襄登

于少保謙

林司寇俊

瞿長史祐

李布政禎

王威寧越

姚少師廣孝

夏少師言

李文正東陽

鳳洲筆記明詩評目錄

鳳洲筆記卷之十一

海虞文臺黃羨中校

明詩評三

曾少詹祭

曾祭字子啓泰和人舉進士第一爲翰林院
修撰遷侍講再遷侍讀學士以史成擢左春
坊大學士久之進少詹事卒年六十一有集
行於世

評曰少詹詞鋒艷發如青萍倚天韻語清華

若紅蕖秀水天馬之歌援毫面試寶帶之錫
同袍莫比又如封節度東征旌甲曳札衣裝
鮮爛然多市人堪戰者寡也

陸詹事深

陸深字子淵華亭人舉進士為翰林編修遷
國子司業乞病歸出為祭酒謫同知延平府
遷按察副使視山西學還復視浙江學累官
四川左布政使入為光祿卿改太常寺卿兼
翰林學士進詹事府詹事罷歸卒

評曰詹事天才卓逸翰墨名家流輩見推彌
布朝野詩如梨園小兒急健華利所至動人
第愧大雅亦短深趣

宋學士濂

宋濂字景濂金華浦江人元進士以文章名
海內至正十七年大臣薦為國史編脩固辭
入龍門山著書

高皇定鼎金陵遣使聘至建禮賢館居之注
遷翰林學士下授禮部主事轉國子司業復

為侍講學士進學士承旨致仕卒年七十二
王侍制禕

王禕字子克義烏人國初應召為翰林國史
編修出判南康郡遷侍制使雲南伏節死
評曰二君名雄虎觀價重鷄林黼黻

皇猷明昌治藻一時文字之顯未覩厥敵初
不以詩名然亦嚴整妥切文寔不大過之宋
有子珩翰詞雋發泛駕之才汗血便隕薦紳
悲憫之矣

劉布衣仔肩

劉仔肩字汝弼鄱陽人

劉布衣績

劉績字孟熙山陰人

評曰仔肩清麗頗識選體績更煜煜妍雅法
長吉歌行雖有特譽終難名家

唐應奉肅

唐肅字處敬山陰人

高帝時為翰林應奉以侍食不敬謫役濠陽

唐侍講之淳

唐之淳字愚士肅之子也洪武末方孝孺薦為翰林侍講所著有平居稿文斷諸書評曰應奉和雅侍講清麗足稱奕世之美若曰詩家正源槩乎未挹也

浦舍人源

浦源字長源無錫人仕為晉府引禮舍人評曰長源一鳴驚人遂優詩社二語信佳境也結粗牽遂捐成調宅篇亦燁燁可采

張汀州寧

張寧字靜之嘉興人舉進士累官禮科都給事中有名上面慰期大用之未久

上崩而當道者負宿怨乘閒出寧為汀州守引疾歸卒

評曰靜之既離瑣闥旋就乞身追念舊恩愴然興涕歌詩本具才敏因鮮沉思大槩一時之雄終難百世之業

吳文定寬

吳寬字原博吳人也舉會試

廷試俱第一授翰林修撰滿考擢右諭德再遷左庶子兼侍讀進少詹事母喪歸復拜吏部侍郎改兼翰林院學士視詹事府事以禮部尚書入東閣知制誥又之卒年七十謚文定有集行於世

評曰文定力掃浮靡一歸雅澹詩如楊柳受風煦然不列又如學究論天下事疊疊竟日本色自露

陳檢討獻章

陳獻章字公甫新會人舉鄉薦七上春官不第退而講道於白沙用大臣薦授翰林院檢討卒

評曰獻章襟度瀟灑神情充豫發為詩歌毋論工拙頗自風雪間作瘦語殊異本色如禪家呵罵擊杖非達磨正法又類優人出譚便極借扣終乘大雅而增城湛若水取為詩教妄加箋釋真目中無珠者也固知陳氏之忠

臣必將鳴鼓湛生之罪矣

王太僕韋

王韋字欽佩上元人舉進士改翰林庶吉士出為尚書郎久之以按察副使視河南學召拜太僕少卿卒

評曰太僕宛曲穠鮮頗類溫李風人之致可挹而言若乃妙舞霓裳逸士猶憎其肉靚粧妖婢見人更羞舉止斯為所短頗號難藥

郭叅軍子章

郭奎字子章以字行巢人國初薦授吳王府叅軍佐大都督朱文正於南昌文正後得罪坐叅軍輔導無狀杖死

評曰叅軍帥幕風流辭藻清麗一時重之良足翫賞究其格品政可張徐之次

沈居士周

沈周字啓南吳人也

評曰居士夙和畫理兼精翰墨塚筆可封尸屨恒滿其詩如村童唱榜歌時操粵音亦自

近情可喜一歌滄浪便覺無復餘興

文待詔徵明

文徵明名璧以字行蘇州人也累舉不第薦授翰林待詔尋致仕歸

評曰徵明方素為質博雅多能却田叔之千金擅鄭虔之二絕藝苑重其珪璋夷荒比之珠貝要其所就可得而擬大氏徵明詩如孝病維摩不能起坐頗入玄言又如衣素女子素曰掩映情致親人第亡丈夫氣格其宅率

易種種可厭今方膾炙人口良可深歎

楊儀部循吉

楊循吉吳人也舉進士為禮部儀制主事即乞病歸歸近六十載而亡所著奚囊雜纂未成書

評曰儀部急流湧退刻意篇章末路難期殊成醜怪詩法初唐未臻實境間趨晚調乃可備觀始信斯道之無窮益觀名家之絕物石文隱珪

石珪字邦彥藁城人也舉進士為翰林庶吉士授檢討久之遷修撰再遷南京侍讀學士國子祭酒入為禮部左侍郎改兼學士進吏部尚書改掌詹事府知東閣誥勅進兼武英殿大學士加少保太子太保罷歸卒
評曰文隱清修之士風調爾雅詩亦僅類之

劉布衣恭

劉恭字士亨錢塘人

馬布衣洪

馬洪字浩瀾錢塘人

評曰士亨錢塘名俊蚤繫高蹈所作歌詩宏富清新然未脫宋元之習浩瀾少出其門尤擅詞學燁燁勝之

張提學和

張和字節之崑山人進士高第為南京刑部郎遷按察副使視浙江學

評曰節之才情洋洋流麗可愛故是臺閣餘派也

莊敏封臬

莊臬字孔暘江寧人舉進士為翰林庶吉士授檢討不肯為上作元宵記疏其事下遷行人司副乞歸又之以薦南京吏部郎病不能之任罷歸

評曰詩以緣物極興非為詰義訓辭臬與陳獻章俱號山林白石至乃鳥點天機梅挑太極如巫師降神望老罵坐兒女走聽雅士掩耳然臬詩別正自有佳處全篇不足存也

王叅政慎中

王慎中字道思晉江人十八舉進士為禮部主事累遷吏部驗封郎中適為常州通判再擢按察僉事視山東學累遷河南左叅政罷歸

評曰道思聲譽赫然縉紳歆慕初年詩格艷麗雖寡天造良極人工歸田以後恃才信筆極其粗野一時後進靡識翕然相師遂成二豎之病重起萬障之魔

唐太史順之

唐太史紀績已見前此評其歸田以後之詩也

評曰太史近亦濫觴互相標榜所謂有狐白之裘而反襲絺縠毋以爲西子者如道思舊作本可二三僕故抑之使世人罔啜其糟毋曰蜉蝣撼樹也

劉御醫溥

劉溥字原濟蘇州人

評曰溥詩如淮陰少年斗健自足時欲噉人又如鍛容長髯便稱劍俠坎軻微位叅將隕裂窮荒使少加揖遜以絺縠登亦一名流也

湯叅將胤績

湯胤績東甌王諸孫也爲俠亡命江南起使北虜授錦衣千戶進指揮僉事再以都指揮充叅將出守孤山遇虜中流矢死

評曰胤績雄才蓋世與劉生鴈行氣所壓政猶小巫見大巫耳又一時有蘇平甘瑾諸人

號十才子僅劉湯羽翼耳

王文靖璩

王璩字汝玉事

太宗為左贊善坐事下獄死

陳檢討繼

陳繼字嗣初

宣宗朝以薦為五經博士稍

遷其官並吳人

評曰汝玉流麗之作受賞儲宮嗣初清新之才應推元相特格既沿卑意復任淺元體蘇

習魯衛之政也

胡中丞續宗

胡續宗字世甫天水人舉進士為翰林檢討

出判州累遷南京吏部郎擢蘇州守累官都

察院右副都御史撫河南罷歸

評曰中丞天質穎敏風度瀟灑亦一關中之

雋第命意淺率不足多傳雖緣是罹口幾陷

大繆何益於已

邵文莊寶

邵寶字國賢無錫人舉進士為許州守擢戶部員外郎遷郎中進按察副使視江西學累遷左布政使召拜右副都御史督漕運入為戶部左侍郎乞養母歸以南京禮部尚書召不赴久之卒

儲文懿

儲瓘字靜之泰州人舉進士為吏部主事遷考功郎中擢太僕少卿累擢南京吏部左侍郎卒

評曰二子詩如雙燕並飛差池可賞終不離庭院間

岳修撰

岳正字季方灤人舉進士及第為翰林編脩遷右春坊右贊善改修撰入內閣叅機務謫戍甘州尋召復原職出知興化引疾歸久之卒

評曰修撰不以詩名家微吐一二頗有風旨至於格調槩乎未聞

鳳洲筆記卷之十一

鳳洲筆記卷之十二

海虞文臺黃羨中校

明詩評四

解學士縉

解縉字大紳吉水人

高帝時舉進士為翰林庶吉士授監察御史
罷歸里建文初戍河州召為待詔

太宗下南京入內閣預機務遷文淵閣大學士
兼翰林院學士出叅議交趾下獄死

評曰學士黃閣首叅玉堂名俊詩家者流寰
海推價然多對客之揮頗謝撚髭之苦彼和
如腐毫摩詰走甕匪乏兼人勞此徑日詩如
蒲類海邊野馬飲啄雖雄馳驟無節不堪羈
勒

張中丞楷

張楷字域之海寧人舉進士爲監察御史累
遷都察院右僉都御史

張興化琦

張琦字君玉四明人舉進士爲興化守
評曰中丞遍和唐詩可謂捧心益醜究其才
致實一時之彥也興化亦有思致去古邈矣

劉叅政昌

劉昌字欽謨蘇州人舉進士爲工部郎以纂
脩召遷河南提學副使至叅政以沒

評曰欽謨才拙國琛識窮夏鼎尤工倩麗更
足風情膾炙菁華能重洛陽之帛雕虫綴羽
尚存吳閫之集如村女簪花非不豐艷本態

自如

夏布政寅

夏寅字正夫華亭人舉進士為山東提學副使每試諸生日暮納卷畢閱卷亦畢藻鑑人才多在驪黃牝牡之外嘗曰君子有二惜此生不學一可惜也此日閒過二可惜也此身一敗三可惜也君子以為名言累遷四川布政使卒

評曰正夫既負穎達刻意詞家每卷中見欽謨姓名不敢下筆其雅慕相伏如此晚年有作衆謂過之其詩如鄉里老人衣錦繡見達官非不嚴麗但鄙甚可厭

張學士以寧

張以寧字志道古田人也仕元為翰林學士承旨國初以侍講學士使安南凡三往竟卒於路

評曰學士革命遺臣皇初禁掖朱方奉使類博望之乘槎白首投荒鮮陸生之垂橐詩既

目變故復備延采韻語亦健氣格少完但達
致未云耳

黃五嶽省曾

黃省曾字勉之吳人也舉鄉貢卒

評曰勉之身滯鄉校名在公卿論詩則納履
獻吉講學則撤比伯安詩刻意六朝諸家綴
集華麗之語聯以艱深之法如亂石槩疊遠
望鬱然縱橫難上又如闔門肆中五彩眩目
原非珍品坐索高價

謝文肅鐸

謝鐸字鳴治黃巖人舉進士爲翰林庶吉士
授編修遷侍講久之擢南京國子祭酒移疾
歸復起爲禮部右侍郎兼祭酒致仕卒
評曰文肅資乏玄朗功深琢磨遜心長沙之
門用構臺閣之體

廖學士道南

廖道南字鳴吾蒲圻人舉進士爲翰林編修
遷右中允再進侍讀學士應制爲文章

上重之父喪歸西迎

上於承天衣紅

上弗悅也罷其官

童庶子承叙

童承叙字以吉沔陽人與學士同任編修又
之遷左贊善再遷左庶子兼侍讀以疾卒
評曰學士緣凌厲之資發躁競之念應制備
於側媚酬送由乎頃刻雖才若倚馬而嚮回
亂蛙庶子同號楚中之傑清麗過之然何大

懸殊哉

桑通判悅

桑悅字民懌常熟人未冠舉鄉薦久之不第
授太和訓導累遷柳州通判引疾歸卒

評曰民懌一覽輒誦千言不草氣凌五侯目
鮮百代可謂文陣之健兒人群之逸驥矣詩
如洛陽博徒家無擔石一擲百萬又如灌將
軍罵坐雖復伉健終鮮致語

張山人詩

張詩字以言都人也號崑崙山人

評曰詩上處如王平子脫衣樹上探雀教傲
睨見賞下者如周伯仁醉後露其醜穢

張山人含

張含字愈光永昌人舉鄉貢不第嘗師事李
獻吉又自稱何氏好友云

評曰山人才氣麗橫律法少陵僅得其拙長
歌下筆千言節奏無端精采不足如落日忽
羸宿鴉成陣勢雖猛快無非惡聲

劉誠意基

劉基字伯溫青田人事

高帝爲太史令遷御史中丞兼弘文館學士
封誠意伯卒年六十五集行於世

評曰基詩如河朔少年充悅伉健又如果下
騮驕嘶有情至乃坐策四維逸推百筭籌運
帷幄勛留鼎彝賈其餘力尚追作者豈易言
哉豈易言哉

許中丞宗魯

許宗魯字伯誠關中人也舉進士改翰林庶
吉士授監察御史擢按察僉事親湖廣學久
之進副使入為太僕少卿改大理少卿進右
僉都御史撫真定罷歸凡二十年起經畧昌
平遷副都御史撫遼左

評曰中丞五七言位置勻穩首尾妥潔氣格
粗備可當作手使更推思入玄取材進古得
不颯颯其言哉

孫左司炎

孫炎字伯融句容人事

高皇帝為幕僚授中書都事遷左司郎中總
制處州軍府陷賊不屈死之

評曰左司俠氣驚發辨辭虹矯疆圉之寄援
分以沒今作歌詩十不一二存者然頗跌宕
雄逸青鳳吉光之裘片羽千金藏龍如意之
珠一照累乘奚啻多哉

王新建守仁

王守仁字伯安餘姚人舉進士為刑部主事

謝病歸起復兵部主事上疏罪狀劉瑾下獄杖幾死謫龍場驛丞久之瑾誅稍遷廬陵令召為吏部驗封主事三遷考功郎中進南京太僕少卿遷鴻臚卿尋以都察院左僉都御史提督南贛諸軍討山賊大破之擢副都御史子一子官平寧王拜南京兵部尚書封新建伯父喪歸起兼左都御史平田州亂卒年五十八集今行於世評曰新建雄畧蓋世雋才逸羣詩初銳意作

者未經體裁奇語間出自解為多雖謝專家之業亦一羽翼之雋也四時詩如五花駿馬嘶踏雄麗頗多蹶步暮年如武士削髮縱談玄理僉語錯出君子譏之

唐太宰龍

唐龍字虞佐蘭溪人舉進士為郟城令擢監察御史出按雲南及江西俱有聲進陝西按察副使視學政再進按察使以都察院右僉都御史召總漕政入為吏部右侍郎遷左侍

郎擢兵部尚書秦隴諸邊有功加太子少保
入為刑部尚書侍母歸十餘載以南京吏部
尚書召改兵部加太子太保尋改吏部坐事
免卒年七十二

評曰龍詩如永州石奇重有致不如太湖嵌
空玲瓏

張太常羽

張羽字來儀烏程人累官翰林侍制太常寺
丞

徐布政賁

徐賁字幼文長洲人累官廣東左布政

評曰國初稱高楊張徐云吳中四傑要之等
第可舉而言夫其既富才情未閑骨體來儀
之視孟載不能以寸而季迪之視幼文大有
所長必使躋者鮮愧容等者亡怒色恐未可
也

江提學以達

江以達字于順貴溪人也舉進士為刑部郎

遷福建按察僉事再遷湖廣副使俱視學政
罷歸

評曰于順才情頗裕體格亦存一時名筆恨
少雅致耳

汪廷尉文盛

汪文盛字崇周崇陽人也舉進士為兵部郎
出知興化遷按察副使視浙江學母喪歸復
除陝西按察副使已擢江西按察使遂進都
察院右僉都御史撫雲南入為大理寺卿以

疾乞休歸卒

評曰廷尉詞藻整麗骨氣不弱第乏師友之
功未就深玄之理

蘇司馬祐

蘇祐字允吉濮人也舉進士為吳縣令授監
察御史遷按察副使視江西學累官副都御
史撫山西入為刑部右侍郎遷兵部左侍郎
亡何兼右僉都御史總督宣大諸鎮後罷歸
卒

評曰司馬清穩不如許伯誠健壯亦可魯衛之政也

郭定襄登

郭登故武定侯英諸孫也初任勛衛從征麓川有功還授都指揮同知都督僉事副總大同兵乂之戰北虜獲級多再進右都督為征西前將軍大敗虜封定襄伯召還理南京都督府適安置甘肅尋復故封總京營兵卒謚忠武

評曰定襄奇士也磨盾操檄橫槊賦詩雄論風生絢辭電掃如送季方之作怨而不怒它篇奕奕固是將種登詩如弄波榜人大自標捷又如魏司徒善射令人驚目

于少保謙

于謙字廷益錢塘人舉進士為監察御史擢兵部侍郎進尚書以功加少保復辟事坐殊死

評曰少保負穎異之才蓄經綸之識詩如河

朔少年兒無論風雅頗自奕奕快爽

林司寇俊

林俊字待用莆田人也舉進士為刑部郎坐論妖僧忤旨下獄謫姚州倅累遷湖廣按察使引疾告歸以右僉都御史召撫江西再乞歸復以副都御史撫蜀討蜀寇有功加右都御史又乞歸文之嘉靖初召為工部尚書後復改為刑部尚書又乞歸加太子太保廼卒

評曰俊詩頗極刻削又復癡重如灌莽中突起奇石又如折翅角鷹振撇難振

瞿長史祐

瞿祐字宗吉錢塘人累官周王左長史

李布政禎

李禎字昌祺以字行廬陵人舉進士為翰林庶吉士授刑部主事累遷河南左布政使評曰二君俱長填詞小解詩亦清新要非作手

王威寧越

王越字世昌濬人也舉進士爲監察御史累軍功至太子太保兵部尚書封威寧伯改征西前將軍填大同坐罪罷起爲左都御史總陝西三邊諸軍復加少保太子太傅卒謚襄敏

評曰越詩多叙塞上情致如田家作苦歌以自勞可謂悲盡

姚少師廣孝

姚廣孝相城人一名道衍削髮從釋教以謀干

太宗起燕邸累進太子少師卒贈榮國公謚恭靖

評曰少師棲遁禪宗裏嬰世網既叅佐命卒叛初服互逃儒釋之間未獲進退之所其詩如入忉利天雖自快樂未就解脫魔障旣深終當墮落

夏少師言

夏言字公謹貴溪人舉進士爲行人授吏科給事中累遷都給事中以上疏論郊祀遷翰林侍讀學士再遷少詹事遂拜禮部尚書入內閣久之累加少師太子太師吏部尚書華蓋殿大學士坐法下獄誅死

評曰少師襲偉遺躡要階襖起幾望終作僂人才長於奏牘他詩如武庫矛戈種種出間殊少利器又如夏侯鼎古意蕩然

李文正東陽

李東陽字賓之長沙人也五歲以能詩善書詞上召見宮中令供奉翰林十七舉進士改庶吉士授編脩九載遷侍講滿考爲學士加左庶子進太常少卿又進禮部右侍郎司內制遂預機務累官少師太子太師吏部尚書華蓋殿大學士致仕卒年七十贈太師謚文正有集行於世

評曰東陽髫年供奉早捷賢科一時才名大噪晚登三事鈞握二紀聲施四垂詩家達者

情乎未講體格徒逞才情枚生累帑少游揮
毫角險爭捷加灾墨卿予嘗譬之如積潦成
陂雖復汪洋輕淺易涸樂府自謂絕世寔則
史斷一章有子名兆先未立而夭其風韻奕
奕絕句四首大類竹枝佳境少加鉛塹之年
奚止箕裘之業

鳳洲筆記卷之十二

程